



Broj: 01-50-1-15-7/07

Sarajevo, 12. aprila 2007.godine

Z A P I S N I K

7. sjednice Predstavničkog doma Parlamentarne skupštine Bosne i Hercegovine, održane 12. aprila 2007. godine

Sjednica je počela u 10 sati. Prisustvovalo je 39 poslanika. Odsustvo je opravdao Zlatko Lagumdžija. (Vahid Hećo i Edin Mušić odsustvovali su zbog ostavke).

Iz Vijeća ministara BiH sjednici su prisustvovali: predsjedavajući Nikola Špirić i ministri Sredoje Nović, Safet Halilović i Bariša Čolak, te zamjenici ministara Marina Pendeš, Vilim Primorac i Senad Šepić.

Sjednici su prisustvovali i predstavnici Ureda za reviziju institucija BiH Milenko Šego i Dragan Kulina, kao i glavni tužilac BiH Marinko Jurčević – zbog razmatranja njihovih izvještaja.

Iz međunarodnih organizacija prisustvovali su predstavnici: OHR-a, OSCE-a, NATO-a, američke ambasade, kao i nevladinih organizacija - Centra civilnih inicijativa i Centra za promociju civilnog društva.

Nakon što je dao kraće uvodne napomene o prijedlogu dnevnog reda, predsjedavajući Doma Beriz Belkić podsjetio je na zaključak Doma sa 6. sjednice, da se Dom, u okviru prethodnog pitanja, izjasni o prijedlozima zaključaka iznesenim u raspravi o Prijedlogu zakona o Budžetu institucija BiH za 2007. godinu. Predsjedavajući je podsjetio da je tekst predloženih zaključaka naveden i u Zapisniku 6. sjednice, a da je Jerko Ivanković Lijanović na sjednicu dostavio revidirani prijedlog zaključka, umjesto onog koji je predložio na prošloj sjednici.

O prijedlozima zaključaka kraće su diskutirali: Azra Hadžiahmetović, predsjedavajući Vijeća ministara BiH Nikola Špirić, Jozo Križanović, Momčilo Novaković i Bajazit Jašarević.

Nakon rasprave, predsjedavajući je proveo glasanje o svim predloženim zaključcima pojedinačno.

Usvojeni su prijedlozi zaključaka koje su podnijeli poslanici:

- Azra Hadžiahmetović – prvi zaključak,
- Vinko Zorić – s određenim izmjenama na prijedlog iznesen u raspravi,
- Halid Genjac – tri zaključka i
- Jerko Ivanković Lijanović.

Prema tome, na prijedloge poslanika iznesene u raspravi o Prijedlogu zakona o Budžetu institucija BiH i međunarodnih obaveza BiH za 2007. godinu, usvojeni su sljedeći

Z A K L J U Č C I

1. Obavezuje se Vijeće ministara BiH da prije isteka tekuće godine Parlamentarnoj skupštini BiH dostavi prijedlog budžeta institucija BiH za narednu godinu.

2. Predstavnički dom zahtijeva od Vijeća ministara BiH da pripremi i najkasnije za 45 dana u parlamentarnu proceduru dostavi Prijedlog zakona o plaćama u institucijama Bosne i Hercegovine.

3. Predstavnički dom zahtijeva od Vijeća ministara BiH da, zajedno s Izvještajem o izvršenju Budžeta institucija BiH za 2006. godinu, Parlamentarnoj skupštini BiH na razmatranje dostavi, s izvještajem o osnivanju svih komisija koje je osnovalo Vijeće ministara BiH u prethodnom sazivu, izvještaj o razlozima za njihovo osnivanje i troškovima za njihov rad.

4. Predstavnički dom zahtijeva da Vijeće ministara BiH, zajedno sa Izvještajem o izvršenju Budžeta za 2006. godinu, pripremi i Parlamentarnoj skupštini BiH na razmatranje dostavi plan za racionalizaciju i smanjenje troškova zakupnine poslovnih prostora za rad institucija Bosne i Hercegovine.

5. Predstavnički dom preporučuje Vijeću ministara BiH da iz sredstava o kojima odlučuje Vijeće ministara BiH do 15. maja 2007. godine odobri sredstva za podršku Boćarskom savezu BiH u organizaciji prvenstva (Amandman IV. u Izvještaju Komisije za finansije i budžet o Prijedlogu zakona o Budžetu institucija BiH za 2007. godinu, od 26.3.2007.).

6. Obavezuje se Vijeće ministara BiH da, zajedno s komisijama Predstavničkog doma, razmotri zakone o porezu na dodatu vrijednost i akcizama i predloži njihove izmjene tako što će povećati porez na luksuzne robe, vodeći računa o zaštiti domaće proizvodnje, a prikupljena sredstva od povećanja poreza na luksuzne robe predvidjeti u rebalansu budžeta i budžetu za iduću godinu za poticaje u poljoprivrednoj i prehrambenoj proizvodnji.

7. Zadužuju se predsjedavajući klubova poslanika u Predstavničkom domu Parlamentarne skupštine BiH da, u saradnji s Vijećem ministara BiH i predstavnicima Opštine Srebrenica, prate način utroška rezerviranih sredstava u Budžetu institucija BiH za 2007. godinu za sanaciju stanja u Srebrenici.

Nisu usvojeni prijedlozi zaključka broj 2. Azre Hadžiahmetović i Prijedlog zaključka Zlatka Lagumdžije, koji glase:

«Da Ministarstvo finansija i trezora BiH, nakon Izvještaja o izvršenju Budžeta za 2006. godinu, razmotri mogućnost da kroz Rebalans budžeta korigira stavku koja se odnosi na realizaciju Programa povratka izbjeglih i raseljenih lica. Korekcija bi se odnosila na Program posebnih namjena - Fond za povratak, a iznos bi bio određen u zavisnosti od stavke Preneseni prihodi iz prethodne godine i uvažavajući amandman V. koji je usvojen na Komisiji za finansije i budžet.» (Azra Hadžiahmetović);

«Parlamentarna skupština BiH usvaja zaključke koji su obavezujući za Vijeće ministara BiH i pojedine ministre u datim rokovima, nakon čega se očekuje da podnesu ostavke kako ne bi bili smijenjeni zbog eventualnog neizvršavanja obaveza po sljedećim zaključcima.» (Zlatko Lagumdžija).

Poslije glasanja o predloženim zaključcima, predsjedavajući je otvorio raspravu o prijedlogu dnevnog reda 7. sjednice.

Denis Bećirović predložio je da se dnevni red dopuni tačkom: Razmatranje inicijative za pokretanje javne kampanje protiv iskorištavanja radnika na crno i utvrđivanje crne liste poslodavaca koji zapošljavaju radnike na crno. Obrazložio je svoj prijedlog.

Predsjedavajući Belkić predložio je da se pripremi tekst zaključka uz prijedlog ove tačke i rekao da bi bilo bolje da se ona uvrsti u dnevni red naredne sjednice.

Denis Bećirović prihvatio je ovu sugestiju predsjedavajućeg, tražeći garanciju da će ova tačka sigurno biti uvrštena u dnevni red sljedeće sjednice.

O prijedlogu Denisa Bećirovića kraće su diskutirali predsjedavajući Vijeća ministara BiH Nikola Špirić i Milorad Živković. Zatim je predsjedavajući Belkić konstatirao da 7. sjednica Doma ima sljedeći

DNEVNI RED

1. Usvajanje Zapisnika 6. sjednice Predstavničkog doma;
2. Poslanička pitanja i odgovori;
3. Imenovanje:
 - a) sekretara Predstavničkog doma PSBiH,
 - b) sekretara Zajedničke službe PSBiH,
4. Zahtjev Vijeća ministara BiH za razmatranje Prijedloga zakona o okviru deviznog poslovanja u BiH po skraćenom postupku, u skladu s članom 126. Poslovnika;
5. Prijedlog zakona o izmjeni i dopuni Zakona o osnovama sigurnosti saobraćaja na putevima u BiH - predlagač: Dom naroda, s Izvještajem Komisije za saobraćaj i komunikacije,
6. Prijedlog zakona o izmjeni Zakona o konkurenciji BiH - predlagač: poslanik Milorad Živković (prvo čitanje);
7. Prijedlog zakona o dopunama Zakona o industrijskom vlasništvu u BiH
 - predlagači: poslanici Selim Bešliagić, Mirjana Malić (prvo čitanje);

8. Izvještaj komisije Kolegija o nastojanju za postizanje sporazuma o zahtjevu poslanika Remzije Kadrića za razmatranje Prijedloga zakona o izmjenama i dopunama Zakona o državljanstvu BiH po skraćenom postupku, u skladu s članom 126. Poslovnika;
9. Izvještaj komisije Kolegija o nastojanju za postizanje sporazuma o prijedlogu za uvrštavanje u dnevni red «Informacije Vijeća ministara BiH o povećanju dnevnica i drugih prinaldežnosti u institucijama BiH (predlagač: poslanik Denis Bećirović);
10. Izvještaj Ureda za reviziju institucija BiH o reviziji za 2005. godinu:
 - Ministarstva odbrane BiH,
 - Ministarstva pravde BiH,
 - Ministarstva sigurnosti BiH,
 - Ministarstva vanjske trgovine i ekonomskih odnosa BiH,
 - Ministarstva vanjskih poslova BiH,
 - Ministarstva za ljudska prava i izbjeglice BiH,
 - Parlamentarne skupštine BiH,
 - Komisije za imovinske zahtjeve raseljenih lica i izbjeglica,
 - Komisije za zaštitu nacionalnih spomenika BiH,
 - Pravobranilaštva BiH,
 - Predsjedništva BiH,
 - Regulatorne agencije za komunikacije BiH,
 - Službe za zajedničke poslove institucija BiH,
 - Centralne izborne komisije BiH,
 - Suda BiH,
 - Tužilaštva BiH,
 - Uprave za indirektno oporezivanje BiH,
 - Ureda za veterinarstvo BiH,
 - Ustavnog suda BiH,
 - Visokog sudskog i tužilačkog vijeća BiH,
 - Izvještaj o izvršenju budžeta institucija BiH.
11. Informacija o radu Tužilaštva BiH za 2006. godinu;
12. Izvještaj o zaštiti ličnih podataka u Bosni i Hercegovini i o radu Komisije za zaštitu ličnih podataka za 2006. godinu;
13. Prijedlog odluke o utvrđivanju prestanka mandata poslanika u Predstavničkom domu:
 - a) Vahidu Heći, zbog podnošenja ostavke radi imenovanja na drugu dužnost,
 - b) Edinu Mušiću, zbog podnošenja ostavke radi imenovanja na drugu dužnost,
14. Davanje saglasnosti za ratifikaciju:
 - a) Sporazuma između Vijeća ministara BiH i Vlade Republike Slovenije o policijskoj saradnji,
 - b) Sporazuma o socijalnom osiguranju između Bosne i Hercegovine i Republike Slovenije,
 - c) Ženevskog akta haškog sporazuma o međunarodnoj registraciji industrijskog dizajna od 2. jula 1999.,
 - d) Sporazuma između Bosne i Hercegovine i Srbije i Crne Gore o pojednostavljenom postupku prometa ljudi i roba na graničnim prijelazima Uvac – Uvac i Ustibar – Vagan,
 - e) Sporazuma o određivanju graničnih prijelaza između Bosne i Hercegovine i Srbije i Srne Gore,
 - f) Sporazuma između Bosne i Hercegovine i Srbije i Crne Gore o pograničnom saobraćaju,
 - g) Sporazuma o zračnom saobraćaju između Vijeća ministara BiH i Vijeća ministara Republike Albanije,
 - h) Sporazuma o saradnji između Vijeća ministara BiH i Vlade Republike Italije u oblasti borbe protiv organiziranog kriminala,
 - i) Sporazuma između Vijeća ministara BiH i Vlade Islamske Republike Iran o saradnji u oblasti sigurnosti.

Ad – 1. Usvajanje Zapisnika 6. sjednice Predstavničkog doma

Nije bilo rasprave.

Sa 34 glasa ‘za’ i jednim ‘suzdržanim’, usvojen je Zapisnik 6. sjednice Doma.

Ad – 2. Poslanička pitanja i odgovori

Predsjedavajući Belkić konstatirao je da su pred ovu sjednicu odgovore na pitanja dobili poslanici Jozo Križanović – od Upravnog odbora Javnog RTV servisa i Slavko Jovičić – od Kolegija Doma na dio pitanja postavljenog na 5. sjednici, kao i da je Kolegij odgovorio na inicijative Kluba poslanika Stranke za BiH i Kluba poslanika SDA, te poslanika Rifata Dolića i Vinka Zorića. Dalje je predsjedavajući rekao da na veliki broj poslaničkih pitanja nije odgovoreno, te da koristi prisustvo predsjedavajućeg i članova Vijeća ministara BiH da ih pozove da respektiraju poslanička pitanja i da se prema njima odgovorno odnose, jer se, inače, gubi smisao njihovog postavljanja.

Denis Bećirović podržao je primjedbu predsjedavajućeg i zatražio da odnos prema poslaničkim pitanjima bude ozbiljniji. Naglasio da ima 90% poslanika koji nisu dobili odgovor ni na jedno pitanje i da misli da je to diskreditacija cijelog Parlamenta. Predložio je i donošenje odgovarajućeg zaključka kako bi se ovo pitanje ozbiljno shvatilo.

Predsjedavajući Belkić rekao je da ovo nije novo, da je ovakav odnos prema poslaničkim pitanjima bio i u prethodnom mandatu, ali da Kolegij radi na tome da se odnos promijeni i da u tom smislu očekuje poboljšanje. Zatim je dao mogućnost za postavljanje novih pitanja.

Postavljena su nova poslanička pitanja kako slijedi:

Vinko Zorić:

«Ima li Vijeće ministara BiH kapacitete i jesu li se stekli uslovi za ukidanje akciza na lož-ulje?»

Rifat Dolić:

«1. Pitanje ministru za ljudska prava i izbjeglice u Vijeću ministara BiH Safetu Haliloviću: Koliko danas u BiH ima kolektivnih izbjegličkih naselja, gdje se nalaze, koliko u njima boravi izbjeglica i šta planirate preduzimati u budućnosti da se pronađe dostojanstvenije rješenje za ove ljude?»

«2. Pitanje predsjedavajućem Vijeća ministara BiH Nikoli Špiriću: Šta planirate preduzeti na rješavanju pitanja protesta poljoprivrednika i šatorskog naselja ispred zgrade Parlamentarne skupštine BiH koji već gotovo 600 dana upozoravaju na probleme u poljoprivredi i ne uspijevaju nas nagovoriti da se više okupiramo ovim problemom i pronalaskom zajedničkog rješenja?»

Remzija Kadrić:

«Koji zakoni, propisi i sudski poslovници, koji su bili na snazi na teritoriji BiH, u trenutku kada je Dejtonski ustav stupio na snagu, i dalje važe, a u skladu s članom 2. Aneksa II (prijelazne odredbe) Dejtonskog mirovnog sporazuma? Tražim da mi se odgovori u pisanoj formi, u skladu s članom 152. Poslovnika.»

Momčilo Novaković:

«Pitanje upućujem Vijeću ministara BiH i Komisiji: Zašto do danas Komisija za ispitivanje istine o stradanjima građana Sarajeva - Srba, Hrvata, Bošnjaka, Jevreja i ostalih u Sarajevu u periodu 1992. – 1995. nije dostavila izvještaj? S obzirom da su razlozi nefunkcioniranja bili u medijima, tražim da se dostavi izvještaj o razlozima nefunkcioniranja ove komisije?»

«Drugo pitanje upućujem predsjedavajućem Predsjedništva BiH: Na 11. sjednici Predsjedništva BiH, održanoj 27. marta 2007., usvojeni su zaključci, pod brojem 05-011-978-11/07, a u vezi s inicijativom o promjeni svih akata koji pojedine državljane BiH stavljaju u neravnopravan položaj. Da li zaključci podrazumijevaju i promjene u Ustavu BiH?»

Slavko Jovičić:

«Moje poslaničko pitanje upućujem Safetu Haliloviću i Svenu Alkalaju, u vezi s posjetom delegacije Kongresa bošnjačke dijaspeore iz Sjeverne Amerike: Tražim da mi ministri u pisanoj formi odgovore koji su članovi sačinjavali tu delegaciju po nacionalnoj strukturi i da li su ih primili na razgovor u svojstvu ministara Vijeća ministara BiH ili visokih zvaničnika Stranke za BiH?»

Sadik Sado Bahtić:

“...Postavljam pitanje – Šta je preduzelo državno tužilaštvo – po principu *ex officio* (po službenoj dužnosti) da se ispita kako je bez privatizacije i jedne marke uplaćene državi, bez tendera, bez više ponuđača, bez ikakve transparentnosti.... od države oduzeta Sarajevska pivara vrijedna blizu 500 miliona KM. S obzirom da je u sve bilo uključeno više izvršilaca, pa čak i ukinuti Federalni zavod za reviziju, nije moguće doći do bilo kakvog revizorskog izvještaja, pitam glavnog državnog tužioca – hoće li, kada i šta preduzeti da se procesuiraju jedna od najvećih pljački državne imovine i kapitala u BiH?”

Husein Nanić:

“Parlament Federacije BiH odobrio je kreditno zaduženje Federacije za finansiranje projekata u oblasti privatizacije preduzeća tzv. PTAC projekat. S obzirom da je očigledno kako proces privatizacije nije ubrzan nego čak usporen, tražim da mi se dostavi informacija o tome koliko je sredstava iz tog kredita potrošeno, u šta su sredstva potrošena, koje su firme odabrane za tzv. konsultantske usluge i kakve je efekte na privatizaciju imala primjena tog projekta, odnosno kredita?”

Denis Bećirović:

1. "Kakvi su konkretni efekti rada Agencije za promociju stranih investicija u posljednje četiri godine? – Pitanje ministru vanjske trgovine i ekonomskih odnosa BiH.

2. Šta ste konkretno preduzeli u dosadašnjem dijelu mandata s ciljem donošenja zakona o sportu BiH i šta planirate uraditi u narednom periodu u vezi s ovim pitanjem? – Pitanje ministru civilnih poslova BiH."

Snježana Rajilić:

«Šta će ili šta može preduzeti Vijeće ministara BiH u pogledu vanjskopolitičke aktivnosti kako bi na vrijeme preduprijedili odlaganje radioaktivnog otpada na Trgovskoj gori – Općina Dvor na Uni, Republika Hrvatska?»

Milorad Živković:

«Pitanje upućujem ministru vanjskih poslova: U razgovoru s ambasadorom Irana iznijeli ste sljedeći stav (prema napisima u medijima) – BiH smatra da Iran ima puno pravo da razvija nuklearnu tehnologiju u mirnodopske svrhe.

Moje pitanje:

- a) Da li ste ovakav stav usaglasili s Predsjedništvom BiH;
- b) da li Ministarstvo vanjskih poslova ima informaciju da je neko od članica Evropske unije ili NATO-a iznio isti ili sličan stav i
- c) da li imate informacije kakav je zvaničan stav Izraela o ovom pitanju?»

Prilikom postavljanja pitanja Denis Bećirović je predložio da Dom usvoji zaključak – da do naredne sjednice poslanici dobiju listu svih postavljenih poslaničkih pitanja na koja do sada nisu dobili odgovore – sa navodima ko je pitanje postavio, šta je sadržina i kome je poslaničko pitanje postavljeno.

Predsjedavajući Belkić je odgovorio da ne treba usvajati zaključak, da će se organizirati dostavljanje poslaničkih pitanja, tako da se o prijedlogu zaključka nije glasalo.

Ad – 3. Imenovanje:

- a) sekretara Predstavničkog doma PSBiH,
- b) sekretara Zajedničke službe PSBiH.

U uvodnim napomenama predsjedavajući Belkić rekao je da je Kolegij Doma za sekretara Predstavničkog doma predložio Branku Todorović, a da su kolegiji oba doma Aljošu Čamparu predložili za sekretara Zajedničke službe Parlamentarne skupštine BiH.

Nije bilo rasprave pa je predsjedavajući proveo glasanje pojedinačno za oba prijedloga.

Jednoglasno su (u momentu glasanja prisutno 37 poslanika) imenovani:

- a) Branka Todorović za sekretara Predstavničkog doma,
- b) Aljoša Čampara za sekretara Zajedničke službe Parlamentarne skupštine BiH.

Ad – 4. Zahtjev Vijeća ministara BiH za razmatranje Prijedloga zakona o okviru deviznog poslovanja u BiH po skraćenom postupku, u skladu s članom 126. Poslovnika

Drago Kalabić je u ime Kluba kazao da su oni protiv skraćene procedure i da smatraju da ovaj zakonski prijedlog treba razmatrati u redovnom postupku.

Nije bilo više rasprave pa je predsjedavajući proveo glasanje.

"Za" zahtjev predlagачa glasalo je 27 (Federacija BiH 22, RS pet), "protiv" je glasalo sedam, tri poslanika su se "suzdržala".

Predsjedavajući je konstatirao da je usvojen zahtjev da se Prijedlog zakona o okviru deviznog poslovanja razmatra po skraćenom postupku. Zatim je prešao na narednu tačku dnevnog reda.

Branko Dokić intervenirao je rekavši da njegov glas nije pravilno registriran, nakon čega je Drago Kalabić zatražio da se glasanje ponovi.

Predsjedavajući je zamolio da se provjeri tehnika glasanja i da se vidi o čemu se radi. Zatim je rekao da intervencija nije blagovremeno iznesena jer je on već otvorio narednu tačku dnevnog reda.

U vezi s ovim pitanjem diskutirali su: Drago Kalabić, Beriz Belkić, Šefik Džaferović, Milorad Živković i Momčilo Novaković.

Na zahtjev Momčila Novakovića, data je pauza.

Poslije pauze, predsjedavajući Belkić rekao je da je razgovarao s Brankom Dokićem i da se Dokić slaže da se njegov glas pripiše glasovima "protiv". I Drago Kalabić saglasio se da se ne ponavlja glasanje. Prema tome, "za" zahtjev za skraćeni postupak glasalo je 27 poslanika (Federacija BiH 22, RS pet), "protiv" je glasalo osam, a tri su bila "suzdržana".

Ad – 5. Prijedlog zakona o izmjeni i dopuni Zakona o osnovama sigurnosti saobraćaja na putevima u BiH - predlagач: Dom naroda, s Izvještajem Komisije za saobraćaj i komunikacije

U uvodnim napomenama predsjedavajući je podsjetio na proceduru koja je provedena o Prijedlogu zakona, te naglasio da je izvještaj nadležne komisije negativan i da se Dom o Izvještaju izjašnjava u skladu s Poslovníkom.

U raspravi su učestvovali: Halid Genjac, Azra Hadžiahmetović, Brako Dokić, Slavko Jovičić i Milorad Živković.

Nakon rasprave, provedeno je glasanje o Izvještaju Komisije.

Sa 28 glasova "za" (Federacija BiH 15, RS 13), devet "protiv" i jednim "suzdržanim", usvojen je Izvještaj Komisije za saobraćaj i komunikacije.

Predsjedavajući je konstatirao da je usvojanjem negativnog izvještaja Komisije pao Prijedlog zakona o izmjeni i dopuni Zakona o osnovama sigurnosti saobraćaja na putevima u BiH.

Ad – 6. Prijedlog zakona o izmjeni Zakona o konkurenciji BiH - predlagач: poslanik Milorad Živković (prvo čitanje)

Uvodne napomene dao je predsjedavajući Belkić.

Nije bilo rasprave.

Prijedlog zakona usvojen je u prvom čitanju jednoglasno – sa 37 glasova.

Ad – 7. Prijedlog zakona o dopunama Zakona o industrijskom vlasništvu u BiH - predlagачi: poslanici Selim Bešliagić, Mirjana Malić (prvo čitanje)

Nije bilo rasprave ni o ovoj tački dnevnog reda.

Sa 35 glasova "za" i tri "suzdržana", usvojen je u prvom čitanju Prijedlog zakona o industrijskom vlasništvu u Bosni i Hercegovini.

Ad – 8. Izvještaj komisije Kolegija o nastojanju za postizanje sporazuma o zahtjevu poslanika Remzije Kadrića za razmatranje Prijedloga zakona o izmjenama i dopunama Zakona o državljanstvu BiH po skraćenom postupku, u skladu s članom 126. Poslovnika

Predsjedavajući je podsjetio da u Kolegiju kao komisiji nije postignuta saglasnost o zahtjevu poslanika Kadrića da se pomenuti zakon razmatra po skraćenom postupku.

U raspravi su učestvovali Remzija Kadrić i Milorad Živković. Zatim je provedeno glasanje u drugom krugu.

"Za" su glasala 22, "protiv" 11, "suzdržala" su se tri poslanika.

Predsjedavajući je konstatirao da nije usvojen zahtjev Kadrića da se Prijedlog zakona o izmjenama i dopunama Zakona o državljanstvu razmatra po skraćenom postupku (2/3 iz entiteta glasalo "protiv"), te da će se razmatrati u redovnoj proceduri.

Ad – 9. Izvještaj komisije Kolegija o nastojanju za postizanje sporazuma o prijedlogu za uvrštavanje u dnevni red «Informacije Vijeća ministara BiH o povećanju dnevnica i drugih prinadležnosti u institucijama BiH (predlagač: poslanik Denis Bećirović)

Ni o prijedlogu Denisa Bećirovića za uvrštavanje predmetnog pitanja u raspravu nije postignuta saglasnost, konstatirao je predsjedavajući Belkić.

Nije bilo rasprave pa je odmah provedeno glasanje u drugom krugu.

"Za" je glasalo 20, "protiv" 13, "suzdržala" su se četiri poslanika.

Predsjedavajući je konstatirao da prijedlog nije usvojen.

Ad – 10. Izvještaj Ureda za reviziju institucija BiH o reviziji za 2005.godinu:

- Ministarstva odbrane BiH,
- Ministarstva pravde BiH,
- Ministarstva sigurnosti BiH,
- Ministarstva vanjske trgovine i ekonomskih odnosa BiH,
- Ministarstva vanjskih poslova BiH,
- Ministarstva za ljudska prava i izbjeglice BiH,
- Parlamentarne skupštine BiH,
- Komisije za imovinske zahtjeve raseljenih lica i izbjeglica,
- Komisije za zaštitu nacionalnih spomenika BiH,
- Pravobranilaštva BiH,
- Predsjedništva BiH,
- Regulatorne agencije za komunikacije BiH,
- Službe za zajedničke poslove institucija BiH,
- Centralne izborne komisije BiH,
- Suda BiH,
- Tužilaštva BiH,
- Uprave za indirektno oporezivanje BiH,
- Ureda za veterinarstvo BiH,
- Ustavnog suda BiH,
- Visokog sudskog i tužilačkog vijeća BiH,
- Izvještaj o izvršenju budžeta institucija BiH.

Predsjedavajući Belkić je u uvodnim napomenama inicirao da se o izvještajima o reviziji otvori rasprava, rekavši da im na 6. sjednici, kada je razmatran dio izvještaja o reviziji, nije poklonjena adekvatna pažnja jer je dnevni red bio opterećen i drugim važnim tačkama. Zatim je otvorio raspravu.

Sadik Bahtić govorio je u ime Komisije za finansije i budžet. Rekao je da je Komisija detaljno razmotrila sve izvještaje o reviziji i predložila Domu da ih usvoji sa izvještajima Komisije u kojima su sadržani određeni zaključci i preporuke. I on je naglasio da se prošli put zbog Budžeta brzo prešlo preko dijela izvještaja o reviziji, ali da bi danas ipak trebalo otvoriti širu raspravu, jer prema izvještajima o reviziji – koji su dobro i korektno urađeni, ima dosta nepoštivanja finansijske discipline, posebno kod javnih nabavki, kod planiranja budžeta pojedinih institucija i ministarstava, gdje se prikaže 100% zaposlenost, a ne popuni se, pa se ta sredstva isplate kroz razne komisije, rekao je predsjedavajući Komisije za finansije i budžet.

Povodom izvještaja o reviziji, na ovoj sjednici vođena je šira rasprava u kojoj su učestvovali: Vinko Zorić, Rifat Dolić, Bajazit Jašarević, Šefik Džaferović, Halid Genjac, Momčilo Novaković, Jerko Ivanković Lijanović, Drago Kalabić, Niko Lozančić, Branko Dokić i Beriz Belkić.

U ime Ureda za reviziju govorio je generalni revizor Milenko Šego.

Sumirajući raspravu, predsjedavajući Doma Beriz Belkić podsjetio je poslanike da je Komisija za finansije i budžet, povodom razmatranja izvještaja o reviziji svih institucija, kao i Izvještaja o izvršenju Budžeta, sačinila zbirni izvještaj o izvještajima za sve institucije, kao i izvještaje za svaku instituciju pojedinačno – u kojima su sadržani određeni zaključci i preporuke koji su obavezujući za institucije na koje se odnose. Dalje je predsjedavajući rekao da će Kolegij, pored izvještaja sa zaključcima i preporukama, koji će se dostaviti svim institucijama, Ministarstvu finansija i trezora BiH i Uredu za reviziju dostaviti transkript rasprave, iz kojeg će moći uzeti u obzir sve inicijative koje su poslanici iznijeli, kako bi se pokrenule aktivnosti na preispitivanju određenih zakonskih odredbi, imajući u vidu da su Ministarstvo finansija i trezora BiH i Ured za reviziju najpozvaniji da sugeriraju adekvatne izmjene zakonskih propisa iz ove oblasti.

S ovom konstatacijom, predsjedavajući je u paketu dao na glasanje sve izvještaje iz ove tačke dnevnog reda, s izvještajima Komisije za finansije i budžet.

Izvještaji su usvojeni sa 34 glasa "za" (Federacija BiH 21, RS 13) i dva "suzdržana".

Zatim je predsjedavajući, na prijedlog Rifata Dolića, na glasanje dao sljedeći

ZAKLJUČAK

Zadužuje se Kolegij Predstavničkog doma Parlamentarne skupštine BiH da izvještaje Ureda za reviziju institucija BiH o reviziji za 2005. godinu, zajedno s izvještajima Komisije za finansije i budžet, te stenogramom rasprave o ovim izvještajima dostavi nadležnom tužilaštvu na daljnje postupanje i eventualno pokretanje istražnih radnji prema odgovornim licima zbog nepravilnosti i kršenja zakona u raspolaganju budžetskim sredstvima.

Zaključak je usvojen sa 25 glasova "za" (Federacija BiH 12, RS 13), jednim "protiv" i šest "suzdržanih".

Ad – 11. Informacija o radu Tužilaštva BiH za 2006. godinu

Poslije kraćih uvodnih napomena predsjedavajućeg Doma, Šefik Džaferović govorio je u ime Ustavnopravne komisije. On je posebno podcrtao 2.tačku - Mišljenje Komisije o Informaciji, kojim je rečeno da je Ustavnopravna komisija u raspravi posvetila posebnu pažnju problemima navedenim u Informaciji koji su opterećivali rad Tužilaštva BiH, te da od Parlamentarne skupštine BiH, Predsjedništva BiH i Vijeća ministara BiH očekuje puni angažman kako bi ti problemi bili prevaziđeni. Posebno je govorio o problemima Odjela za ratne zločine, te u tom kontekstu o problemu dvojnog državljanstva lica osumnjičenih za krivična djela ratnog zločina zbog onemogućavanja njihovog izručenja. Predložio je da se Mišljenje Ustavnopravne komisije dostavi Vijeću ministara BiH i Predsjedništvu BiH, s transkriptom rasprave o Informaciji Tužilaštva BiH.

O Informaciji je vođena duža rasprava u kojoj su učestvovali: Husein Nanić, Milica Marković, Jozo Križanović, Sadik Ahmetović, Azra Hadžiahmetović, Momčilo Novaković, Halid Genjac, Slavko Jovičić, Ekrem Ajanović, Jerko Ivanković Lijanović, Remzija Kadrić, Sefer Halilović i Beriz Belkić. Zatim je govorio glavni tužilac Marinko Jurčević.

Poslije rasprave predsjedavajući je konstatirao da će Parlament podržati realizaciju ciljeva koje je Tužilaštvo BiH navelo u Informaciji a zatim je na glasanje dao stav Ustavnopravne komisije – da se Informacija primi k znanju, s Mišljenjem Ustavnopravne komisije o Informaciji.

"Za" su glasala 33 poslanika, jedan je glasao "protiv", a jedan se "suzdržao".

Predsjedavajući je konstatirao da je Predstavnički dom primio k znanju Informaciju o radu Tužilaštva BiH za 2006. godinu i da podržava mjere koje je Tužilaštvo BiH predvidjelo realizirati u periodu 2006.-2010. godina.

Zatim je predsjedavajući na glasanje dao Prijedlog zaključka koji je u raspravi predložio Sadik Ahmetović, koji glasi:

«Da se odmah pokrene procedura izmjene Zakona o Sudu BiH i Zakona o Tužilaštvu BiH, kojima će se, pored posebnih odjela u ovim institucijama, formirati i odjel za zločin genocida počinjen u zaštićenoj zoni Ujedinjenih naroda Srebrenica i Žepa, sa sjedištem u Srebrenici».

"Za" Prijedlog zaključka glasalo je 17 poslanika (Federacija BiH 15, RS dva), "protiv" je glasalo 12, "suzdržala" su se četiri.

Predsjedavajući je konstatirao da Prijedlog zaključka nije dobio entitetsku većinu i da slijedi usaglašavanje.

Ad – 12. Izvještaj o zaštiti ličnih podataka u Bosni i Hercegovini i o radu Komisije za zaštitu ličnih podataka za 2006. godinu

U ime Ustavnopravne komisije govorio je njen predsjedavajući Šefik Džaferović, koji je ukratko obrazložio Mišljenje i skrenuo pažnju na zaključak koji Komisija predlaže Domu na usvajanje.

Kratko je povodom Izvještaja diskutirao Beriz Belkić. Zatim je na glasanje dao Izvještaj s Mišljenjem Komisije u kojem se predlaže sljedeći

Z A K L J U Č A K

Obavezuje se Vijeće ministara BiH da bez odgađanja preduzme sve aktivnosti i pristupi osnivanju agencije za zaštitu ličnih podataka.

"Za" je glasalo 26 (Federacija BiH 16, RS 10), "suzdržalo" se pet poslanika.

Predsjedavajući je konstatirao da je usvojen Izvještaj o zaštiti ličnih podataka u BiH i o radu Komisije za zaštitu ličnih podataka za 2006. godinu, s Mišljenjem Ustavnopravne komisije i navedenim zaključkom.

Ad – 13. Prijedlog odluke o utvrđivanju prestanka mandata poslanika u Predstavničkom domu:

- a) Vahidu Heći, zbog podnošenja ostavke radi imenovanja na drugu dužnost,**
- b) Edinu Mušiću, zbog podnošenja ostavke radi imenovanja na drugu dužnost.**

Dom je jednoglasno usvojio odluke o prestanku mandata poslanika u Predstavničkom domu Vahidu Heći i Edinu Mušiću zbog podnošenja ostavke radi imenovanja na drugu dužnost.

Ad – 14. Davanje saglasnosti za ratifikaciju:

- a) Sporazuma između Vijeća ministara BiH i Vlade Republike Slovenije o policijskoj saradnji,
- b) Sporazuma o socijalnom osiguranju između Bosne i Hercegovine i Republike Slovenije,
- c) Ženevskog akta haškog sporazuma o međunarodnoj registraciji industrijskog dizajna od 2. jula 1999.,
- d) Sporazuma između Bosne i Hercegovine i Srbije i Crne Gore o pojednostavljenom postupku prometa ljudi i roba na graničnim prijelazima Uvac – Uvac i Ustibar – Vagan,
- e) Sporazuma o određivanju graničnih prijelaza između Bosne i Hercegovine i Srbije i Crne Gore,
- f) Sporazuma između Bosne i Hercegovine i Srbije i Crne Gore o pograničnom saobraćaju,
- g) Sporazuma o zračnom saobraćaju između Vijeća ministara BiH i Vijeća ministara Republike Albanije,

- h) Sporazuma o saradnji između Vijeća ministara BiH i Vlade Republike Italije u oblasti borbe protiv organiziranog kriminala,
- i) Sporazuma između Vijeća ministara BiH i Vlade Islamske Republike Iran o saradnji u oblasti sigurnosti.

Predsjedavajući je podsjetio poslanike da je nadležna komisija u međuvremenu održala sjednicu i razmatrala sve akte iz ove tačke, te dostavila izvještaje Domu, u kojima predlaže da se da saglasnost za ratifikaciju svih ovih akata.

Nije bilo rasprave.

Sa 31 glasom "za" i jednim "protiv", Dom je dao saglasnost za ratifikaciju svih akata iz ove tačke.

Predsjedavajući je konstatirao da je ovim realiziran dnevni red 7. sjednice. Obavijestio je poslanike da će se 8. sjednica održati 26. aprila 2007., a zajednička sjednica oba doma 27. aprila 2007. godine.

Ovim je, u 14,40 sati, završena 7. sjednica Predstavničkog doma.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić